

Morning Dogri (NSD) National News Bulletin 15-06-2025

आकाशवाणी

1. प्रधानमंत्री नरेन्द्र मोदी होर 5एं दिनें दे साइप्रस, कनाडा ते क्रोएशिया दे दौरे पर खाना होई गे न।
2. भारती अंतरिक्ष यात्री शुभांशु शुक्ला गी अंतरिक्ष च लेइयै जाने आले एक्सओम-4 मिशन दा प्रक्षेपण हुन 19 जून गी कीता जाग।
3. कैलाश मानसरोवर यात्रा दा पैहला जत्था अज्ज गैंगटॉक सिक्किम पुज्जोग।
4. इजराइल आस्सेआ तेहरान पर हमला करने मगरा ईरान नै इजराइल पर मिसाइलें कन्नै हमला कीता ऐ।
5. दिल्ली च भारी बरखा तेज हवा चलने करी गर्मी थमां राहत थोई ऐ ते ब्लाऊ दा म्यार बी बधेया ऐ।
6. बीसीसीआई नै बैंगलुरु च रॉयल चैलेंजर्स बैंगलुरु दी आईपीएल जित्त दे जश्न दरान होई दिएं घटनाएं गी रोकने लेई व्यापक दिशा निर्देश तैआर करने लेई इक समिति दा गठन कीता ऐ।

<><><><><><>

PM Visit

प्रधानमंत्री नरेन्द्र मोदी होर अज्ज साइप्रस, कनाडा ते क्रोएशिया दी 5एं दिनें दे दौरे पर खाना होई गे न। साइप्रस दे राष्ट्रपति निकोस क्रिस्टोडौलिडेस हुंदे साददे पर श्री मोदी होर अज्ज साइप्रस दी राजधानी निकोसिया पुज्जगंन। दऊं दहाके दरान कुसै बी भारतीय प्रधानमंत्री दा साइप्रस दी एह पैहली यात्रा होग। निकोसिया च श्री मोदी होर साइप्रस दे राष्ट्रपति हुंदे कन्नै मलाटी करगंन ते लिमासोल च बपार जगत दे प्रतिनिधिएं गी संबोधत बी करगंन। इस यात्रा कन्नै दपक्खी सरबंघ बधने ते भू-मध्य समुंद्री क्षेत्र ते यूरोपीय संघ कन्नै भारत दी सांझेदारी मजबूत करने च मदद थहोग। यात्रा दे दुए गेड़ च श्री मोदी होर कनाडा दे प्रधानमंत्री मॉर्क कार्नी हुंदे साददे उपपर कल जी-7 शिखर सम्मेलन च हिस्सा लैने लेई कनाडा ते कनानास्किस पुज्जगंन। एह प्रधानमंत्री हुंदी लगातार 6मीं बारी जी-7 शिखर सम्मेलन च भागीदारी होग। प्रधानमंत्री मोदी हुंदी यात्रा दे खीरी गेड़ च मोदी होर 18 जून गी क्रोएशिया दी यात्रा उपपर जांगन। एह कुसै बी भारतीय प्रधानमंत्री दी क्रोएशिया दी पैहली

यात्रा होग। इस दरान श्री मोदी होरें क्रोएशिया दे प्रधानमंत्री आंद्रेज प्लेकोविच हुंदे कन्नै दपक्खी गल्लबात करगंन ते क्रसेएशिया दे राष्ट्रपति जोरान सिलनोविच हुंदे कन्नै बी मलाटी करगंन।

<><><><><><>

PM

प्रधानमंत्री नरेन्द्र मोदी होरें साइप्रस, कनाडा ते क्रोएशिया दी 5एं दिनें दी यात्रा पर रवाना होने थमां पैहले आखेआ जे साइप्रस भारत दा इक नेड़मा सैह्योगी ऐ ते भूमध्यउसागरीय क्षेत्र ते यूरोपीय संघस च महत्वै आला हिस्सेदार ऐ। उनें आखेआ जे इस यात्रा कन्नै एतिहासक सरबंधें ते बपार, निवेश, सुरक्षा, प्रौद्योगिकी दे खेत्तरें च सरबंध मजबूत करने च सहायता थहोग। प्रधानमंत्री मोदी होरें कनाडा च जी-7 शिखर सम्मेलन च हिस्सा लैने बारे आखेआ जे एहदे च वैश्विक मुद्दें ते ग्लोबल साउथ दिएं प्राथमिकताएं पर बचार बंआदरा होग। उनें आखेआ जे ओह भ्याल मुखें दे नेताएं कन्नै जुड़ने लेई उत्सुक न। क्रोएशिया दी यात्रा बारे श्री मोदी होरें आखेआ जे दौनें देशें दे सदियां पराने नेड़मे सांस्कृतिक सरबंध न। उनें आखेआ जे भारती प्रधानमंत्री दी क्रोएशिया दी पैहली यात्रा दे रूपै च एह आपसी हितै आले खेत्तरें च दपक्खी सैह्योग दे नमें रस्ते खोलग। प्रधानमंत्री होरें आखेआ जे त्रऊं देशें दी इस यात्रा कन्नै बन्ने पार, आतंकवाद खलाफ लड़ाई च भारत दा समर्थन करने लेई धन्नबाद देने दा मौका ऐ।

<><><><><><>

AXIOM-4

भारतीय अंतरिक्ष यात्री शुभांशु शुक्ला गी अंतर्राष्ट्रीय अंतरिक्ष स्टेशन भेजने दे एक्सिओम-4 मिशन दी नमीं तरीक 19 जून तैह कीती गई ऐ। इस मिशन च चिर होने दा कारण एहदे च तकनीकी खराबी हर, लेकन हुन उसी ठीक करने मगरा लमीं तरीक दी घोषणा कीती गई ऐ। भारतीय अंतरिक्ष अनुसंधान संगठन इसरो एक्सिओम स्पेस ते स्पेस-एक्स दे बश्कार होई दी बैठक च एह पुष्टि कीती गई कि फेलकान-9 प्रक्षेपण वाहन च आई दी तरल आक्सिजन रिसाव दी समस्या गी सफलतापूर्वक हल करी लैता गेआ ऐ।

<><><><><><>

Kailash Mansarovar Yatra

कैलाश मानसरोवर यात्रा दे श्रद्धालुएं दा पैहला जत्थ अज्ज गैंगटॉक पुज्जग। सिक्किम सरकार नै श्रद्धालुएं दे सुआगत आस्तै सारे लोड़चदे इंतजाम कीते दे न। एह यात्रा 5एं बरें दे वक्फे परैंत 20 जून गी शुरू होग। आकाशवाणी कन्ने गल्लबात करदे होई सैलसफा ते बपारिक उड्डयन मैह्कमे दे अडिशनल मुख् सचिव सी.एस.राओ होरें दस्सेआ जे पैहले जत्थे च सरकारी अधिकारिएं सनें 35 यात्री होंगन, जेह्ड़े अज्ज पुज्जी जांगन।

<><><><><><>

Israel-Iran

इजराइल ते ईरान नै मिसाइल हमले दा इक दुए उप्पर घातक प्रहार होर तेज करी दित्ता ऐ। की जे ईरानी प्रोजेक्टाइलें इजराइल दे बड्डे शैहरें गी लशाना बनाया हा। जिसलै के इजराइली फौज नै कल तेहरान च फौजी इंस्टालेशनं उप्पर लगातार हमले कीते हे। इस लड़ाई नै मध्य पूर्व गी तबाह करी दित्ता ऐ।

<><><><><><>

Heavy Rain

राष्ट्रीय राजधानी च अज्ज बडलै तेज हवाएं कन्नै बरखा बरी। बरखा कारण दिल्ली च तापमान च बड़ी मती गिरावट आई ऐ ते लोकें गी गर्मी थमां राहत हासल होइ ऐ। ब्लाऊ दी गुणवत्ता च बी सुधार होआ ऐ। विभाग मूजब बडलै राश्ट्रीय राजधानी च 80 थमां 100 किलोमीटर फही घैंटे दी रफ्तार कन्नै तेज हवा चलने ते बरखा पौने करी ट्रैफिक दी आओजाई पर असर पेआ ऐ। केइएं खलके इलाकें च पानी भरोची दियशं बी खबरां आइयां न। ताई मौसम विभाग नै तमिलनाडू, तटीय कर्नाटक, केरल, कोकन ते बोवा च अज्ज बड़ी मती तेज बरखा पौने दा रैड अलर्ट जारी कीता ऐ। विभाग मूजब लक्षद्वीप, तटीय आंध्रप्रदेश ते तेलंगाना च अज्ज बरखा दी पेशनगोई कीती गई ऐ। ताई देसे दे पच्छिम-उत्तर हिस्सें च अज्ज लूह दा असर घट्ट होने दी मेद ऐ। मौसम विभाग नै अज्ज उत्तराखंड ते पूर्वी राजस्थान च तेज बरखा दी पेशनगोई कीती ऐ।

<><><><><><>

BCCI

भारतीय क्रिकेट कंट्रोल बोर्ड नै बेंगलुरु च रॉयल चैलेंजर्स बेंगलुरु दा आईपीएल जित्त दे जश्न दरान होई दिएं घटनाएं गी रोकले लेई व्यापक दिशा निर्देश तैआर करने लेई इक समिति दा गठन कीता ऐ। एह फ़ैसला कल बोर्ड दी 28मीं शीर्ष परिषद दी बैठक च लैता गेआ। समिति दे अध्यक्ष देवजीत सैकिया होंगन। एह्दे च प्रभतेज सिंह भाटिया ते राजीव शुक्ला बी शामिल होंगन। एह् समिति 15एं दिनें व दिशा निर्देश तैआर करोग। शीर्ष परिषद नै अहमदाबाद ते बेंगलुरु च होई दिएं दुखद घटनाएं च बेदोषें लोकें दी मौतें पर बी दुख प्रगट कीता। एह्दे अलावा शीर्ष परिषद नै अगले ब'रे जनवरी म्हीने च न्यूजीलैंड कन्नै भारत दी होने आली घरेलू श्रृंखला लेई थाहरें दी पुष्टि कीती।

<><><><><><>

Uttarakhand

उत्तराखंड च देहरादून थमां केदारनाथ जा'रदास इक हैलीकाप्टर गौरी कुंड च हादसे दा शकार होई गेआ ऐ। एह्दे च 6 लोक सुआर हे। एह् हैलीकाप्टर त्रिजुगी नारायण ते गौरीकुंड बशकार लापता होइ गेआ ऐ। शुरूआती खबरें थमां पता लग्गेआ ऐ जे तकनीकी खराबी करी डोआरी नियंत्रण प्रणाली जाम होई गई ते चानचक्क लैंडिंग दी कोशश च हैलीकाप्टर हादसे दा शकार होई गेआ।

<><><><><><>

Amit Shah

केन्द्री गृहमंत्री अमित शाह होर अज्ज लखनऊ च इक भव्य समारोह च उत्तर प्रदेश पुलस दे 60 ज्हार 244 नमें भर्ती सिपाहिं गी नियुक्ति पत्र बंडगन। इस कार्यक्रम च मुख्यमंत्री योगी आदित्यनाथ बी मजूद होंगन। सिपाहिं दी सिद्धी भर्ती लेई कुल 60 ज्हार 244 पदे चा 12 ज्हार 48 महिलाएं न।

<><><><><><>

Hockey

हॉकी च भारतीय जूनियर महिलाएं दी टीम नै बैल्जियम दे कोटिच च दौरे दे अपने चौथे मैच च आस्ट्रेलिया उप्पर 2—1द दी जित्त कन्नै यूरोप दौरे च अपनी लगातार जित्त दा सिलसिला जारी रखेआ ऐ। एह् जित्त भारत दी इस दौरे च लगातार चौथी जित्त ऐ।